

Dapli rg che sursilvan en scola

Ils idioms da las emprimas classas

DA CLAUDIA CADRUVI / ANR

■ **Davent da l'emna proxima cumenzan pli blers uffants cun rumantsch grischun en l'emprima classa che cun sursilvan.** Il

sursilvan è l'idiom rumantsch che vegn pledà il pli savens. Ma tar ils scholars d'emprima classa n'è l'idiom da la Surselva betg pli la lingua scritta la pli derasada. Davent da l'emna proxima datti pli blers scholars e scholaras che obtengan la fibla «Passins» en rumantsch grischun che la fibla sursilvana, di *Ivo Berther* dal departament d'educaziun. 40 vischnancas hajan fin uss votà per il rumantsch grischun sco lingua d'instrucziun. Quai sajan circa 50 pertschient da tuttas vischnancas rumantschas. Las pli grondas vischnancas che han introduci il rumantsch grischun èn Savognin, Val Müstair e Laax. Autras vischnancas da tschep cun ina ferma populaziun rumantscha sco Scuol, Mustér, Trun, Vella e Tujetsch n'han anc betg decidì.

En connex cun las linguas da scola sa mussa en l'Engiadina



in'interessant fenomen. Malgrà ch'il vallader da l'Engiadina Bassa è derasà pli fitg che il puter, datti dapli scholars d'emprima classa che obtengan la fibla en pu-

ter che en vallader. La raschun: Las vischnancas da l'Engiadin'Ota sco Puntraschigna e Samedan han pli grondas classas. En l'Engiadina Bassa succeda

l'instrucziun en vallader. En las vischnancas rumantschas da l'Engiadin'Ota, nua che la cum-part d'uffants tudestgs è fitg auta, vegn instrui a moda bilingua.